



Tuhaqtitauyuqhaq

Tuhaqtitauhainnaqtuqhaq

Nunavunmi Nanminiqhurnikkut paannariit aullarutijaat Inunnguqsaivik iliharutikhauti

Iqaluit, Nunavut (Fibjuali 14, 2024) – Nunavut Kavamanga (GN), Nunavut Tunngavik Inc., unalu Kanadaup Kavamanga ublumi aullaqtiqtaa una *Inunnguqsaivik: Ajuiqharniq hulidjutikhanun*.

Una nutaaq ajuiqharnikkut ikajututikkut piniaqhimadjuti ikajurniaqtait Nunavunmin Inuit pijaami ajuiqhimadjutikhanik qaujihimanirnik havagiami munarinikkut Nunavutim nunait, imait, piqutailu taimaatun hapkuat havaakhat munarijakhallu nuutiqtaugumik kavamatuqatkunnin GNkunnun. Ikajurniaqtaillu havaqatigilugillu ukuat amigaittun aularaanginnaqtun Inuinnarnin-hivulliuqtaujuun nunainni piqutainnilu munaridjutiit piniaqhimanirnun Nunavunmi.

Inunnguqsaivik ikajurniaqtaa Nunavuni Inuinnait naunaijaqlutik pilirlugillu iliharutit, ajuiqharniit, havaakkullu aturutkhanik iharigijaujun piniaqhimajaami havaakhanik ukunani nunakkut munaridjutini piqutinilu munaridjutainnik. Ajuiqhaqtun pijaagtun amigaittunun iliharutikhanun ingmingnullu ikajuutikhanik pipkaijaami piqaqtait aturutikhatik ihariagijait nakuujumik iniqhijaamingni.

Ilaulirumik Inunnguqsaivingmi, ajuiqhaqtun atadjutikhaqarniaqtun qaritaujakkuurutinun uuktuqvikhaqarlutik takudjutikkut uqaqagidjutikkullu aallanun piliriamilu pinahuarutikhanun hulidjutikhanullu pidjutilgit ajuiqhautimingnun. Piqangittuq kiklikhaqagtunik ilihautini puqtuniinnun ukunaniluunniit havaakkut ajuiqhimanirnin pihimajariaqangittun aullaqtiriami. Naliit ilihajjuummirutait pidjutilgillu iliharvigjuani pinahuarutini pihimajun hailihimajun hakugiktunik ikajuutikhanik Nunaqaqqaagtunun ilihagtunun talvaniittullu humilu piqaqtuni Inuinnagaqtuni.

Aakassi 2019mi, Angirutigiiguti Ihumagijakkut (AIP) sainiaqtauhimajuq pingahunin ilaujunin, piliuqhuni apqutikhamik nanminiqhuurnirmun munarijakhani pidjutilgit munaridjujittuk uvanilu munaridjutainni Nunavutip kavamtkunni nunanik, imainnik, piqutainnilu Nuanvunmiittuni talvanga kavamatuqatkunnin uvunga GNkunnun.

Angiruti pipkaijuq pivallianirmun uumani [Hivumuunirmun Havaktiliginirnun Pivallianirnun Parnagutikhamik Nanminiqhurnirmun](#). Pipkaqtilluarumania imaatun amigaitqijaujumapkainirnun Inuinnarnik havakliqtukhanik tamainni qaliriiktuni talvani havaakhani piliuqtauniaqtuni GNkunni pidjutaanin nanminiqhuurnirmin, huli ikajuqhimmamaqhugin GNkut havaktuligijit angummadjutait

tuniqhaijaami havaakhait pihimajait Kanadaup Kavamanganin. Inunnguqsaivik piliuqtauhimajuq ikajuriami pijaami turaangajait tikiutijumajailu uumani parnaqutikhami.

Una kingulliqpaaq Nunavunmi Nunainni Piqutainnilu Nanminiqhuunirmi Angirutimi qangannuaq atauttikut-sainiqtauhimajuq taapkunanga pinahunin ilaujunin uvani Januali 18, 2024mi. Nanminiqhaqhuurniq tautuktait ikajuqtaillu hivulliutijaujumajait Nunavunmin, tuniluni angitqijaujunik amiridjutinik ihumaliurutinun nunani piqutinilu, angmarlugulu ukkuaq nutaanun maniliurutikhanun piangaijarnikkullu pivalliadjutikhanun uukturutikhanun nunaptikni.

“Quviahuktunga havaqatigiigutiptionun paannariikhuta Kanadaup Kavamanganun Nunavut Tunngavikunnilu uvani Inunnguqsaiviup pinahuarutaani. Atuliqtipkainaiq uumani Nunavunmi Nunainni Piqutainnilu Nanminiqhuurnikkut Angirutaani ihuaqtukkut aullaqtiqtuq pipkianirnun Inuinnait tamaitalu Nunavunmiutat upalungaiqhimajun havaakhanun tikittukhanun. Sainiutaa angirutimi uvani Nanminiqhuurnirmun ihariagijaujuq qanurliuruti ukunani kavamaliqijikkut pivalliadjutiptionni, kihimi ublumi tautuktaqqut hivunikhamvun aullaqtipkaidjutaani una pinhariti iliahtunun apqutaani havaakhanun nunani piqutinilu munaridjutainni Nunavunmi.”

Maligaliuqti P.J. Akeeagok, Nunavutim Hivuliqtia

"Akhuuqtatkat Inuit piquplugin ikajuutinik hailihimajun uumanga Inunnguqsaivingmin, hivummudjutiinnik iliahtamingnik naunaijarlugillu quvianaqtun uuktuqvikhat havaakhanun nunani piqutinilu munaridjutainni hailihimaniatitun tikittukhani ukiuni."

Angijuqqaq Aluki Kotierk, Nunavut Tunngavik Inc.

"Kanadami Kavamatkut quviahuktuq ikajuriami Inunnguqsaivik pipkaijaami Inuit tunihimajun ajuiqhautikhanik ihariagijaujunik pipkainirnun tautungnaqtunik havaktikhanik. Havaqatigihimmaarniaqtavun paannariikluta ukunani tikittukhanik pingahuni ukiuni ukununga Nunavut Tunngavik unalu Nunavut Kavamanga atuqtipkailirnirmun Nunavunmi Nanminirhuurnirmun Angirutimi pipkaujaamilu ihuaqtumik nuutirutimik. Una puiuruqtaulimaittuq Angiruti ikajurniaqtaa piliuriami Ukiuqtaqtumin-hivulliqtaujumin havaakhanik, uuktuqvikhanik, maniliurutikhanik, piangaijjuumirutikhaniklu Inuinnarnun tamainnullu Nunavunmiunun, tavungaalungmun."

Maligaliuqti Dan Vandal, Minista Ukiuqtaqtumi Kavamaliqidjutainni

Kitkut ilaujumajun ajuiqharnirmun havaakhamun nunani piqutinilu munaridjutainni qaritaujakkut-titiqqijaaqtun inunnguqsaivik@gov.nu.ca. Ilitturijuummirutikhanun, uumingalu qaritaujakkuuqtukkut ilaujaami titiramik uumanilu Inunnguqsaivik 2023-24 Iliharutainnun Naunaijautimik atuqtakhamik, [takulugu https://www.gov.nu.ca/inunnguqsaivik](https://www.gov.nu.ca/inunnguqsaivik).

###

